

# Setmana occitana au licèu Jacques Monod

Enter lo 10 e lo 16 de març, lo licèu Jacques Monod que voló hicar en relacion los eslhèves e los actors deu mond occitan. L'objectiu de tau operacion b'èra de har conèisher e har viver la lenga !



Los drapèus occitan e bearnés qu'estón apitats.

Pòrtas alandadas, mini-vernissatge, visita guidada de la mustra presenta pendent la setmana sancèra « Ua lenga, l'occitan » perpausada peu CFPÒC Aquitània, obradèr cantas polifonicas mercés a l'associacion l'Esquireta, encontre dab un jornalista de Ràdio País en companhia deus 3aus occitanistas deu collègi Simin Palay, concèrt Trad' a la maison deus liceans dab lo collectiu ça-i, contaire, repaish occitan en musica...



« Au mini-vernissatge, los invitats que's hiquèn a cantar, qu'estó un moment hèra esmavent. Que'us mercejam hòrtament. » Norà

Tot aquerò qu'estó possible mercés au sostien de la region Navèra Aquitània, e dab l'empara de l'Inòc (institut regionau occitan) e de l'OPLO (L'Ofici Public de la Lengua Occitana).

Pr'aquò, aquera setmana ne seré pas estada possibla shens nada colaboracion deu caposinèr per exemple, deus professors qui conèishen l'istòria de la lenga, de la direccion deu licèu, solide, e deus eslhèves combatus tà passar per las classas. Samuel e Tilià que'ns contan :

« Au moment d'informar ua classa, amics non-occitanistas que vienón presentar l'opcion dab nosautres^^ Aquò que'ns dè arsèc tà contunhar. Aquera blaga que's revelè eficaça e agradiva : b'estó ua escaduda ! ».

Au miei deus eveniments marcants, l'obradèr cantas dab Silvan Masseillou, musician, cantaire e abelhèr a Lescar. Ua purmèra taus eslhèves de cap tà la canta polifonica, purmèrs sons de tom-tom e flaüta de tres traucs...



Obradèr cantas polifonicas dab Silvan Masseillou.

« Mercés a Laurie d'estar vienuda. Lo còp seguent, que volem mei de monde. Que m'agradè hèra lo son de la flaüta pirenenca... » Norà.

Aute moment hòrt, la conferéncia-testimoniatge de Joan-Nadau Commeres qui amuishè video-

clips deus bons e un estrèit d'un episòdi de *South Park* doblat en occitan.

Qu'estó apreciada la joenessa deus intervienents, ua obèrtura directa de cap tau mond associatiu e professionau qui parla aus liceans. E los vielhs lavètz ? E be que son indispensables tà transmèter, que representan lo ligam enter las generacions. Lo plaser qu'estó partatjat pendent la cantèra deu diluns, pendent los contes deu Daniel Cabarry lo divés.

« Que i a ua gojata qui m'a dit que coneishèva quauquas istuèras contadas peu contaire. » Norà.



Lo contaire pujat sus un banc a l'entrada deu refectòri.

Lo repaish occitan tanben qu'estó plan mes ne s'entenèva pas pro la musica, de dòu har. B'èra tanben lo dia de la visita de la deputada Josy Poueyto au licèu, l'escadença de'u transmèter la nosta volontat d'aver d'occitan dens lo public e d'inc au bachillerat !

« La garbura qu'estó fantastica. » Matèu.

E calha arreténguer un eveniment d'aquera setmana occitana ? Que seré lo concèrt deu dijaus. La maison deus liceans qu'avó aires de sala de bal (gascon). Los dus joens musicians Clément Rousse (acordeon diatonic, vriolon, kick) e Jordan Tisnèr (tom-tom, flaüta de tres traucs, canta) que's son encontrats au Conservatòri de Pau. Que hican en comun un patrimòni preciós deu Bearn e de la Bigòrra basat sus collectatges sonòrs... revisitats a la loa faiçon.



Lo duo Rousse – Tisnèr que vengó perpausar musica gascona gessida deu collectatge mes tanben creacions originaus.

« Ne pensavi pas que lo concèrt b'anava dar l'idèa au monde de dançar ! Eslhèves de segonda, de purmèra, de terminau que's hiquèn a dançar, qu'estó ginhèc. » Valentina.



Dab los 3aus d'occitan deu collègi Simin Palay.

#### + d'infos sur l'occitan

- Pour se pré-inscrire à l'option (tout niveau) : direction la vie scolaire. **Pourquoi ?** Sinon le ministère de donnera pas les heures pour l'année prochaine puisqu'il n'y a pas actuellement d'occitan ni en seconde ni en première.
- Pour se tenir informé des événements et cours divers: <http://ostaubearnes.fr>
- Pour revoir l'exposition « Ua lenga, l'occitan » : <http://www.in-oc.org/fr/>
- Pour contacter le professeur d'occitan : [marion.lavergne1@ac-bordeaux.fr](mailto:marion.lavergne1@ac-bordeaux.fr)

Tilià, Norà, Valentina, Baptista, Matèu e Samuel.